

Na osnovu Člana 12. Statuta Sportskog saveza Grada Mostara, Upravni odbor Saveza na ___ sjednici održanoj ___ godine, donosi :

P R A V I L N I K

O IZBORU I PROGLAŠENJU NAJUSPJEŠNIJIH SPORTISTA I SPORTSKIH RADNIKA GRADA MOSTARA

OSNOVNE ODREDBE

Član 1.

Ovim pravilnikom uređuju se način i postupak službenog izbora i proglašenja najuspješnijih sportista Grada Mostara za postignute sportske rezultate u toku jedne godine.

Član 2.

Sportski savez Grada Mostara utvrđuje sljedeće vrste priznanja:

- **Godišnja priznanja najuspješnijim sportistima i sportskim ekipama**
- **Posebna godišnja priznanja**
- **Nagradu za životno djelo**

I. GODIŠNJA PRIZNANJA

Član 3.

Utvrđuju se sljedeća godišnja priznanja:

1. najuspješniji sportista – senior
2. najuspješniji sportista – junior
3. najuspješniji sportista – kadet
4. najuspješniji sportista – mlađi kadet
5. najuspješnija sportistkinja – seniorka
6. najuspješnija sportistkinja – juniorka
7. najuspješnija sportistkinja – kadetkinja
8. najuspješnija sportistkinja – mlađa kadetkinja
9. najuspješnija muška seniorska ekipa
10. najuspješnija muška mlada ekipa
11. najuspješnija ženska seniorska ekipa
12. najuspješnija ženska mlada ekipa
13. najuspješniji trener

Za jednu godinu mogu se proglasiti najuspješnijima samo jedna sportistkinja i jedan sportista odnosno jedna ženska i jedna muška ekipa u svakoj kategoriji.

Prijedlog za izbor najuspješnijih (nominaciju) mogu dati sportski klubovi, sportski strukovni savezi, te Upravni odbor Sportskog saveza Grada Mostara. Sportista ili sportska ekipa ne mora biti nominirana (predložena) da bi ušla u konkurenciju za izbor najuspješnijih.

U nominaciju za izbor najuspješnijih mogu ući samo sportisti i sportistkinje koji su članovi klubova registrovanih u Sportskom savezu Grada Mostara i koji su BH državljani.

Član 4.

O izboru i proglašenju najuspješnijih sportista odlučuje kriterij najvrjednijeg plasmana postignutog tokom godine na službenim međunarodnim i domaćim sportskim takmičenjima navedenim u ovom Pravilniku.

Član 5.

Na prijedlog „Komisije za izbor i proglašenje najuspješnijih sportista grada Mostara“ koju odredi Upravni odbor Sportskog saveza Grada Mostara odluku o izboru i proglašenju najuspješnijih sportista Grada Mostara potvrđuje i donosi Upravni odbor Sportskog saveza Grada Mostara na osnovu zaprimljenih prijedloga.

Kriteriji i propozicije

Član 6.

Uspješnost sportista utvrđuje se na osnovu postignutih plasmana na službenim međunarodnim sportskim takmičenjima ili službenih svjetskih i europskih rekorda međunarodnih sportskih federacija koje priznaje Međunarodni olimpijski odbor, odnosno Opće udruženje međunarodnih sportskih federacija (AGFIS – GAISF) u sportovima čiji su nacionalni sportski savezi članovi Olimpijskog Odbora Bosne i Hercegovine.

Član 7.

Pod službenim međunarodnim sportskim takmičenjima u ovom Pravilniku podrazumijevaju se, redoslijedom njihova vrijednosnog značenja:

1. Olimpijske igre,
2. Svjetska prvenstva, svjetski kupovi (ukupni plasman/finale), svjetski rekordi,
3. Europska prvenstva, europski kupovi (ukupni plasman/finale), europski rekordi i europska klupska natjecanja,
4. Univerzijada,
5. Mediteranske igre,
6. Balkanska prvenstva
7. Prvenstvo BiH,
8. Kup BiH.

Proglašenje najboljih sportista može biti samo po osnovu takmičarskog plasmana ili rekorda.

Član 8.

Najuspješnijim sportašem Grada Mostara može se proglasiti:

1. **pojedinac – žena i muškarac**
 - a) koji tokom kalendarske godine u individualnom sportu postigne najvrjedniji pojedinačni plasman u odnosu na sve ostale pojedince iz svog i drugih sportova.
 - b) pojedinac iz sastava sportske ekipe koja je postigla značajan rezultat na reprezentativnom takmičenju uz uslov da je bio jedan od najistaknutijih počinaca u ekipi.

U slučaju postizanja istovrsnih plasmana pojedinca iz individualnog sporta i pojedinca iz sportske ekipe, prednost ima pojedinac iz individualnog sporta.

2. **ekipa – ženski i muški sportski sastav od dva i više sportista,**
koja tokom kalendarske godine postigne najvrjedniji ekipni plasman u odnosu na sve ostale ekipe iz svog i drugih sportova.

Član 9.

Plasmani sportista ostvareni na takmičenjima u skladu sa stavom 1. člana 6. ovog Pravilnika, vrjednuju se redoslijedom kategorija od I do X u međusobnom odnosu plasmana i u sklopu svake kategorije gdje imaju istoznačnu vrijednost.

Kategorije	I.	II.	III.	IV.	V.	VI.	VII.	VIII.	IX.	X.
Olimpijske igre	1	2	3	4	5	6	7	8	9	10
Svjetska prvenstva u olimpijskim sportovima disciplinama i granama		1	2	3	4	5	6	7	8	9
Svjetski rekord, svjetski kup u olimpijskim sportovima disciplinama i granama (ukupni poredak)			1	2	3	4	5	6	7	8
Svjetska prvenstva u neolimpijskim sportovima, disciplinama i granama				1	2	3	4	5	6	7
Evropska prvenstva u olimpijskim sportovima disciplinama i granama				1	2	3	4	5	6	7
Svjetski rekord, svjetski kup u neolimpijskim disciplinama i sportovima (ukupni poredak)					1	2	3	4	5	6
Evropski rekord, evropski kup u olimpijskim disciplinama ukupno					1	2	3	4	5	6
Evropska prvenstva u neolimpijskim disciplinama i sportovima						1	2	3	4	5
Evropska klupska natjecanja						1	2	3	4	5
Univerzijada						1	2	3	4	5
Mediterranske Igre							1	2	3	4
Evropski rekord, evropski kup u neolimpijskim disciplinama i sportovima (ukupni poredak)							1	2	3	4
Prvenstvo BiH								1	2	3
Kup BiH									1	2

U slučaju da više pojedinaca ili ekipa postigne istovjetne plasmane iz sklopa jedne od kategorija I. do X. iz stava 1. ovog člana, prednost ima pojedinac odnosno ekipa čiji sport:

1. je olimpijski sport odnosno disciplina.
2. ima bolji prvi sljedeći/sljedeće po vrijednosti postignute plasmane ili rezultate,
3. ima veći broj sportskih saveza/članova u svjetskoj sportskoj federaciji,

Ako je više pojedinaca ili ekipa izjednačeno i nakon primjene parametara od 1. do 3. iz stavka 2. ovog člana, prednost treba imati pojedinac, odnosno ekipa u skladu sa redoslijedom utvrđenog vrijednosnog značenja sportskih takmičenja u stavu 1. člana 6. ovog Pravilnika.

Član 10.

Najuspješnijim sportistima i sportskim ekipama dodjeljuju se skulptura „Trofej Sportskog saveza Grada Mostara“ prihvaćena kao službeno skulpturalno obilježje Sportskog saveza Grada Mostara.

Priznanja iz člana 2. ovog Pravilnika dodjeljuje se svake godine na svečanosti proglašenja najuspješnijih sportista Sportskog saveza Grada Mostara koja se održava početkom naredne kalendarske godine, u odnosu na godinu za koju se vrši izbor najboljih sportista.

Član 11.

O izboru i proglašenju najuspješnijih sportista Sportski savez Grada Mostara vodi posebnu evidenciju.

II. POSEBNA PRIZNANJA

Član 12.

Posebna priznanja dodjeljuju se:

- 1. najuspješnijem sportskom radniku**
- 2. sportistima i sportskim ekipama za ostvarena izuzetna sportska postignuća**

Član 13.

Najuspješnijim sportskim radnikom proglašava se osoba koja je tokom kalendarske godine svojim izuzetnim stručnim angažmanom učestvovao u ostvarenju visokih sportskih rezultata.

Sportski savez Grada Mostara može nagraditi posebnim priznanjima sportiste i sportske ekipe koje su tokom godine ostvarile izuzetne sportske rezultate. Upravni odbor SSGM-a može godišnje dodijeliti najviše 12 takvih priznanja.

III. NAGRADA ZA ŽIVOTNO DJELO

Kao priznanje za doprinos razvoju sporta u Gradu Mostaru i Bosni i Hercegovini, Sportski savez Grada Mostara ustanovio je nagradu koja se svake godine dodjeljuje pojedincima kao „Nagrada za životno djelo u oblasti sporta“.

Član 14.

Sportski savez Grada Mostara jednom godišnje raspisuje konkurs za dodjelu nagrada za životno djelo (u daljnjem tekstu "Nagrada")
Konkurs je javan i objavljuje se na WEB stranicama Sportskog saveza Grada Mostara a o konkursu se obavještavaju svi klubovi i strukovni savezi na području Grada Mostara.

Član 15.

Pravo predlaganja kandidata za Nagradu za životno djelo imaju pojedinci, sportski klubovi i strukovni savezi i Upravni odbor Sportskog saveza grada Mostara.

Predlagatelj ne može predložiti sam sebe.

Prijedlozi se dostavljaju na obrascu koji je sastavni dio ovog Pravilnika a predlagač je dužan prijedlog obrazložiti te potkrijepiti kratkom biografijom i podacima o sportskim aktivnostima predloženog kandidata.

Član 16.

Nagrada za životno djelo Sportskog saveza Grada Mostara može biti dodjeljena pojedincima koji ispunjavaju slijedeće uslove:

- sportistima koji su u periodu aktivnog takmičenja postigli vrhunske sportske rezultate kako na međunarodnim, tako i na domaćim takmičenjima, bilo pojedinačno ili u okviru ekipe za koju su nastupali, a poslije prestanka aktivnog takmičenja proveli najmanje 20.godina kao aktivni društveno-sportski radnici u organizacijama i organima sporta Grada Mostara;
- društveno-sportskim radnicima koji su najmanje u periodu od 30 godina aktivno djelovali u organizacijama i organima sporta Grada Mostara, i na taj način značajno doprinjeli razvoju, unapređivanju i omasovljenju sporta i tjelesne kulture u Mostaru;
- stručnim radnicima (treneri, ljekari sportske medicine i sl.) koji su proveli najmanje 20.godina rada u organizacijama i organima sporta Grada Mostara i ostvarili izuzetno značajne i zapažene rezultate svjetskog, evropskog i državnog značaja.

Za nagradu za životno djelo Sportskog saveza Grada Mostara ne mogu konkurisati lica mlađa od 55 godina starosti.

Član 17.

Godišnje se dodjeljuju najviše dvije Nagrade za životno djelo. Nagradu za životno djelo može se dodijeliti samo jedan put.

Član 18.

Na osnovu prispjelih prijedloga odluku o dodjeli „Nagrade“ donosi Upravni odbor Sportskog saveza grada Mostara.

Član 19.

Dobitnicima Nagrade za životno djelo dodjeljuju se skulptura „Mostarske sportske legende“ - službeno skulpturalno obilježje Sportskog saveza grada Mostara. Sastavni dio nagrade je i pisana povelja.

Član 20.

Skulptura se dodjeljuje svake godine, a uručuje se na svečanosti proglašenja najuspješnijih sportista Grada Mostara.

Član 21.

Sportski savez grada Mostara vodi evidenciju dobitnika Nagrade za životno djelo.

U arhivi SSGM-a pohranjuje se cjelokupna dokumentacija prispjelih prijedloga za dodjelu „Nagrade“.

ZAVRŠNE ODREDBE

Član 22.

Odredbe ovog Pravilnika tumači Upravni odbor Sportskog saveza grada , a za njegovo provođenje zadužen je generalni tajnik Sportskog saveza grada Mostara.

Član 23.

Izmjene i dopune ovog Pravilnika može vršiti Upravni odbor Sportskog saveza grada Mostara.

Član 24.

Ovaj Pravilnik stupa na snagu danom donošenja.

Predsjednik
Sportskog saveza Grada Mostara

Hasan Šišić